



Vun frieher un heit for Bensmer Leit
Bergsträßer Anzeigebblatt 06.05.1950



De Bensmer Joahrmaikd vun frieher

1. Fortsetzung



„Wißter woas?“ hot de Kall gesoat „Wißter woas? Jetz wärd mool niwwergemoachd ande Guutzelschdand“. — Där hot groad ande Eck vuns Skoddies geschdanne. Um den Guutzelschdand rumm häwwwe ganze Schwärm vun Härmense geschwärt. Die veele Leit, die wuu dort vebeigange sinn, häwwese mit ehren ewige Schwenke mit Sackdischer un Hiet nor noch räwälliger gemoachd. — „Ich häbb kaa Gäld“, hot de Franz gesoat „ich kommer kaa Guutzel kaafe!“ — „Kumm nor mit!“ hot de Kall gesoat. Wär mit meer gäiht, brauch kanns! Du kimmschd heit doch noch zu doiner Zoggerschdang!“ De Kall is niwwer zum Härrgottsbrunne gange un hot soi Aeärmel unnerumm bissel feichd gemoachd. Wieer dann ande Guutzelschdand kumme is, horrer sou geduu, als ober äbbes kaafe wollt. Er hot sich iwwer die Auslaage gebeigd un doodebei horrer soizwaa Aeärmel uff die vorderschd Reih vunde Zoggerschdange geleggd. Nadierlich sinn die drou henke blewwe. Mer häwwese oabgerobbd un unner uns vedaald. Die meischde devuu hot de Kall for sich behaalde. — Awwer beim Weirergäih hot uns doch es Gewisse geschloae. Mer wollte groad wenigschdens en Daal vun deene Zoggerschdange wirrer haamlich uff den Schdand legge, doo hots dort en grouße Tumult gäwwwe. Es hot sich rausgeschdellt, daß där Guutzelmann eneme oalde Ourewäller falsch rausgäwwwe hot. Där hots gemäikd un hot en Mordsradau gemoachd. „Da!“ hots Kallche gesoat „da! doo häwwemers joo! Meer Buuwe mache uns Kobbwäih wäje sou poar aadäärmige lumbige Zoggerschdange un die Grouße? Die Grouße bemoogele sich gäjeseitig, dassen die Aage iwwerlaafe!“ —

„Kall!“ hots Frenzel gesoat „Kall, troa die Zoggerschdange reduur. Die bringe der kaa Glick! Uuräächd Gut gedeiht net! Wie oft hot däs schun moin Vadder gesoat!“ — „Wammers zammehelt doch!“ hot de Kall fräsch reduurgäwwwe, hot sein Daal zueme Glumbe zammegedrückt un in soi Hoosedasch geschdobbd. — „Gummool! Vorm Schnawwel soim Haus muß woas besunneres lous soi. Doo schdäih e Masse Leit!“ — Mer häwwwe uns doich die Menschemeng doichgezwend, bis mer vorndrou geschdanne häwwwe. „Das ist die neueste Erfindung aus Amerika!“ hot där Mann hinner dem Schdand ausgeruufe. „Das ist der noch nie dagewesene Hörapparat, der neu erfundene Phonograph! So etwas muß man gesehen, das muß man gehört haben!“ — Dann horrer de Leit, die wuue zäihe Penning hiegeleggd häwwwe, zwaa Schlaich in die Ouhern geschobbd. Doo hot mer peife und singe häijern, als, deet där Piffikus orrer där Senger groad vor aam schdäih. — Däs hot uns awwer net inträssiirt. Es woar net laut genunk. — Doo woars mit dem Duudelsackmann doch woas annerschd. Där hot sein Duudelsack gebloose un zu gleier Zeit horrer uff sein Ricke e grouße Drummel geschnallt gehadde, die zwaa Drummelfäll noach auße. Uff die horrer mirreme Drummelschleggel druffgebumd, där wuu an sein Owveroarm ougemoachd woar. Iwwer däre grouße Drummel woarn zwaa Zindaradeckel aus Mässing. Wann die zamme geschloae häwwwe, hots en Radau gäwwwe, daß sich alle Leit, die wuu groad inde Neh woarn, die Ouhern zuugehoalde häwwwe.“ — „Wie där die zum Zammeschloae gebroachd hot? —

Ja, liewer Froind, däs kann ich der net sou genaas vegliggern. Jeerenfalls, däs waaß ich, däs woaren ganz verworschdelder Kromm vun Drehd un sou un die Zindradeckel horrer mit aam vun soine Schuhoabsetz in Bewegung gesetzt.“ – „Ja, ja, däs gedenkt mer aa noch. — Konnschde dich awwer aa noch an däs Acktsche mit dem Hooseträäjermann erinnern däs wuumer vollfiehrt häwwe? Waaschdes noch, däs woar soun darrabbeliger eeklicher Kärl mirrem lange ritzeroure Board un Matzelaage. Mer häwwe zum Schbaß aan Hooseträäjer noachem annern ouprowiert. Wieer gemäikd hot, daß mer nor unsern Utz mirrem treiwe wollte, horrer uns mit soine roschdige Gißkanneschdimm ougekresche: „Schloagd Eich en Naggel ins Kreiz un bind Eier Hoose drou, ehr Lausert!“ Doo awwer, de Fritz net faul, schlubbdem unner soin Disch un bumbd vun unne dewärrer, dassem soi Hooseträäjer un soi Knebb doichenanner gehubbt sinn, wie die Hoase im Kläiagger. Jäääääd, hot där gedoubd! Mer awwer nix wie devuu! E poar vun uns sinn uff die anner Seit nuffzuusich am Maiquadd soim Läädche geland, wuu die veele schaine Peife ausgeschdellt woarn. En annern daal hot sich nunnerzuusich vedrickt bis zum Aewwedaa.

Aerschd noacherer Weil häwwemer uns wirrer zammegefunne — Vorm Bossemendierläädche vunde Fraa Schdrauß, zwisches Hesche un em Schuhmacher Dellerie hot en groußer Schdand geschdanne mit alle meegliche Sache. Doo hot mer geschdickde Raasedasche kaafe kenne mit roure Rouse un giine Blärrer orrer mit braune Härsch mit Dannezwaag. Aa Pärleportmanee hots doo gäwwe un weiße Haibchin, Schdauche, Wollkabutze, Schdrumbkabbe, Vaddermerder, Vorhemmchin, Schnaggo, Jääjerhemmer, Palntien un Gott, waaß woas noch mäih. Die meischde Sache devuu gitts heit goar net mäih!“ — „Ja, un groad gäjeniwwer am Mayer-Bendhoim? Doo woaren Schdand mit Kabbodhdiedcher. In drei Reihe hinnernanner häwwese uff houche Schdenner doogeschdanne wie die Grenadier. Alle Sorte woarn doo veträäre. Mit un ohne Schdraußfärrern, mit Rouse, Kärsche, Vegißmoinnichschdraiß un Paasee, mit Schlisselblumme un alle meegliche annern Gewechse mit Pärlebeheng, goldne un silwerne Schmärrerling un waaß de Deiwel net, mit woas noch alles. All die Kabodhdied häwwe braare schwazze, braune un bischofsblooe Seire — orrer Samtbenner gehadde, die wuu unnerm Hals zammegebunne worrn sinn. Sou häwwe sich die Madame vun doomools schun woas ehlich gesähe, veschdanne!“ — „Ande Schlinkegaß häwwemer uns bissel veschnaufd. Däs woar e Gedrick un Gedreng ruffzuusich un runnerzusich dasses aam ganz schwummerig vor de Aage worrn is. — E poar Weibslait mit Bidde un Zowwer uffem Kobb, die wuuse drauß inde Vorschdadt kaaft häwwe, häwwe sich Schrittche vor Schrittche doichgeäärscheld. Mer hot wäiklich schdaune misse, wiese däs alles uff ehre „Wisch“ ballaansiert häwwe“. — „Däs uffem Kobb troae hot die heitig Juugend net gelärrnt. Awwer doodefoor troae im Kobb Gedanke, die wuu nix daache!“ — „Hannes, du bischd oald worrn! E anner Gäld, e anneri Wält! Die junge Leit vun heit sinn aa annerschd uffgewoachse wie meer. Mer Oalde kenne doo net mäih mitredde. Jeerenfalls häwwe mer vun unsrer Juugend mäinder gehadde, als die junge Leit vun heitzedoa. Engel, veschdanne, woarn mer awwer aa kaa!“ — „Naa, naa! Däs kommer net groad behaapte. Besunnerschd net, wammer als dem „Schimmer“ noachgemoachd sinn und de „Karoo“ häwwe oachdeckig lache losse!“ — „Um wirrer uffde Joahrmäikd zerickzekumme. Gedenkt Eich noch die „Kinemadegraphebilder“? — Ei freilich! Däs woarn sou klaane Bichelchin mit schdaikem Babier. Wammer die Seite schnäll rummgeblärrert hot, hot mer alles, wie inde Naduur, in Bewegung gesähe. Torner häwwe doo ehr Kunschdickelcher gemoachd, Denseriene sinn rummgehubbst, Veggel sinn doich die Luft geflooge, un Lufdballoone sinn uffgeschdieje. Soue Bichel woar awwer deier!“ — „Däs woar nix annerschd als die Vorlaifer vum heitige

Kino, veschdanne“. — Am Metzjer Aurehemmer hots mool en grouße Ufflaaf gäwwe. Alles is hingeschdreemd. Kaans hat mäih doichgekennt. Doo hot neemlich aaner mirrereer großi Moridaad geschdanne, wiese frieher uff kaam Joahrmäikd gefehlt hot. En oalde Mann hot Leierkaschde gedreht une Fraa mirrerer Schdimm wie e oald Reibeise hot mit ehrem Schdock uff die Bilder gewesse un hotse erkleert. Als Buu hawwich doomools sou oachdgebaßt, daß ich alles wärtlich dehaam häbb uffschreiwene kenne! Sou kimmts, daß ich die Moridaad noch bis uffde heutig Doa behoalde häbb:

Ihr lieben Leute! Kennt Ihr die Geschichte
Von diesem bitterbösen Bösewichte?
Der Angst und Schrecken
Nur tat erwecken,
Wo er sich je gezeiget hat
In Dorf und Stadt!
In Dorf und Stadt!

Einem schönen, blondgelockten Mäderchen,
Man nennt es allgemein das schön Elisabetherchen,

Gab er als Köter,
Der Missetäter
Ein Beinsteinkenchen und nen Ring von Gold.
Weil er sie heiraten wollt!
Weil er sie heiraten wollt!

Nachdem er ihre Sinne so umnebelt,
Und wie zwei Turteltäubchen sie geschnäbelt,
Da schoß der Böse
Mit viel Getöse
Das arm Elisabethdien mausetot.
Allmächtger Gott!
Allmächtger Gott!

Dem Bankier Blumental mit seinem Schreiber
Naht er sich jetzt als Dieb und dann als Reiber.
Und als zu zweien
Sie wollten schreien,
Da dreht er ihnen noch die Häls herum
Da warn sie stumm!
Da warn sie stumm!

Und diesen Mörder, Räuber und Mordbrenner
Erwischt die Polizei am ersten Jänner.
Am siebten Märzen
Da sah man stürzen
Sein blutig Haupt herab von dem Schafott.
Da war er tot!

Da war er tot!

Der Teufel holte seine arme Seele
Und fuhr mit ihr hinab zur Hölle!
Dort wird gebraten
Für seine Taten
Der Bösewicht in aller Ewigkeit!
Und das ist gescheit!
Und das ist gescheit!